

SAMÞYKKT

um stjórn bæjarmálefna í Keflavíkurborg.

I. KAFLI

Um skipan bæjarstjórnar og verkefni hennar.

1. gr.

Bæjarstjórn Keflavíkur skal skipuð 9 mönnum, kjörnum samkv. lögum um sveitarstjórnarkosningar.

2. gr.

Bæjarstjórn Keflavíkur er almennt í fyrirsvari fyrir bæinn og skal engu máli, er hann varðar, ráðið til lykta án umsagnar bæjarstjórnar.

Bæjarstjórninni ber að gæta hagsmuna bæjarins í hvívetna og annast þau viðfangsefni, sem henni eru fengin í lögum og reglugerðum, svo og málefni sem henni eru fengin í samþykktum, er hún hefur sett eða á henni kunna að hvíla að öðru leyti.

Meginverkefni hennar eru þessi:

- A. Bæjarstjórn fer með yfirstjórn á fjárreiðum bæjarins.
 1. Fyrir lok desembermánaðar ár hvert ber bæjarstjórn að gera áætlun um tekjur og gjöld bæjarins fyrir næsta reikningsár (almanaksár). Í fjárhagsáætlun skal sýna í meginatriðum, hvernig fjárveitingu til einstakra stofnana og framkvæmda skuli hagað, sbr. B-lið, ennfremur skal þar sýna, hvernig áætlaðar tekjur skiptast.
 2. Bæjarstjórn skal hafa yfirumsjón með fjárstjórn bæjarins, með því að tekjur séu innheimtar og greiðslur inntar af hendi í samræmi við það, sem ákveðið er í fjárhagsáætlun. Eigi má greiða fé úr bæjarsjóði nema heimild sé til þess í fjárhagsáætlun bæjarins eða annarri ákvörðun bæjarstjórnar.
 3. Hún hefur yfirumsjón með því, að eignir bæjarins séu tryggilega varðveittar.
 4. Bæjarstjórn skal hafa lagt fullnaðarúrskurð á ársreikninga bæjarins eigi síðar en í júlímánuði ár hvert.
- B. Bæjarstjórn fer með yfirstjórn verklegra framkvæmda bæjarins. Í fjárhagsáætlun kveður hún á um verklegar framkvæmdir á fjárhagsárinu í megindráttum. Hún getur og gert heildaráætlanir um framkvæmd tiltekinna verkefna, er taka yfir lengri tíma, svo og um einstök verk, eftir því sem ástæða þykir til.
- C. Bæjarstjórn kýs bæjarstjóra, bæjarráð og aðrar nefndir eftir því, sem segir í reglugerð þessari eða öðrum samþykktum, svo og endurskoðendur reikninga bæjarins, ennfremur skipar hún fasta starfsmenn bæjarins og semur um laun þeirra.

- D. Bæjarstjórn setur reglur um stjórn bæjarmálefna og reglur um stjórn tiltekinna málefna bæjarins, ákveður gjaldskrár bæjarfyrirtækja eftir því, sem þörf krefur o. s. frv.
- E. Bæjarstjórn setur reglur um notkun merkis og fána bæjarins.

II. KAFLI

Fundarsköp bæjarstjórnar.

3. gr.

Á fundi nýkjörinnar bæjarstjórnar og síðan á fyrri fundi í júnímánuði ár hvert kýs bæjarstjórn sér forseta, svo og 1. og 2. varaforseta úr hópi bæjarfulltrúa til eins árs.

Sá er rétt kjörinn forseti, sem fengið hefur atkvæði meira en helming bæjarfulltrúa. Verði þeim atkvæðafjöldi ekki náð, skal kjósa að nýju, og skal þá kjósa um há tvo, sem flest atkvæði fengu. Er þrír eða fleiri, sem um skyldi kjósa, hafa fengið iafnmörg atkvæði, skal varpa hlutkesti um hverja tvo skuli kjósa. Verður þá sá rétt kjörinn, sem fleiri atkvæði fær, þó að hann fái ekki helming atkvæða. Verði atkvæði jöfn, ræður hlutkesti. Með sama hætti skal kjósa varaforseta. Aldursforseti gegnir forsetastörfum, uns kosinn hefur verið forseti. Ef enginn forseta er viðstaddur á fundi bæjarstjórnar, gegnir aldursforseti forsetastöðunni, nema bæjarstjórn ákveði að kjósa sérstakan fundarstjóra í það skipti.

Ef forseti deyr eða varaforseti eða verður varanlega forfallaður frá störfum í bæjarstjórn. áður en kjörtími hans er á enda, skal kjósa forseta í hans stað fyrir þann tíma, sem eftir er kjörtímabilsins.

4. gr.

Forseti bæjarstjórnar stjórnar umræðum á fundum hennar. Hann sér um, að fundargerðir séu skipulega færðar í gerðabók og allar tillögur og ályktanir, séu rétt og nákvæmlega bókaðar, svo og hverja afgreiðslu þær hljóta. Hann sér um, að allt fari reglulega og skipulega fram og eru bæjarfulltrúar og bæjarstjóri skyldir að hlýða úrskurði hans um allt, er varðar fundarsköp, en skjóta má úrskurði hans undir úrlausn bæjarstjórnar, ef vafi leikur á um skilning fundarskapa.

5. gr.

Á sama fundi, sem forsetakosning fer fram, kýs bæjarstjórn tvo skrifara og tvo til vara úr hópi bæjarfulltrúa til eins árs í senn. Skrifara skal kjósa hlutfallskosningu.

Skrifarar skulu telja saman atkvæði þá er atkvæðagreiðslur fara fram.

6. gr.

Bæjarstjórn ræður sérstakan fundarritara utan bæjarstjórnar, sem sér um færslu gerðabókar, og hafa skrifarar í samráði við forseta eftirlit með því, að rétt sé fært til bókar. Í gerðabók skal geta, hvar og hvenær fundur sé haldinn. hverjir sitji fundinn og hver sé fundarritari.

Í fundarlok skal lesa upp gerðabók og skal forseti og aðrir viðstaddir fulltrúar undirrita hana. Fulltrúar eiga rétt á, að bókaðar verði athugasemdir þeirra í gerðabók ef þeim þykir eitthvað rangt bókað eða ónákvæmt svo og um ágreiningsatkvæði sín, fáeinum orðum.

7. gr.

Bæjarstjórn heldur reglulega fundi fyrsta og þriðja þriðjudag hvers mánaðar kl. 17.00, ef mál eru fyrir hendi, og stendur fundur svo lengi, sem þörf gerist, en þó

eigi lengur en til miðnættis, nema meiri hluti bæjarfulltrúa samþykki. Þegar boðaður fundartími er kominn og meiri hluti fulltrúa mættur, skal forseti setja fund.

Heimilt er bæjarstjórn að fella niður fundi í júlí og ágúst. Ef fundur ferst fyrir vegna helgi eða af öðrum orsökum, skal halda hann einhvern næsta virkan dag ef þörf krefur.

Aukafundi skal halda, þegar bæjarstjóri, forseti bæjarstjórnar eða þrír bæjarfulltrúar hið fæsta óska þess.

8. gr.

Bæjarstjóri semur dagskrá bæjarstjórnarfunda.

Á dagskrá skal taka:

1. Fundargerðir bæjarráðs og annarra lögmætra nefnda, sem þurfa kunna staðfestingar bæjarstjórnar á ályktunum sínum.
2. Hvert það mál, sem fellur undir verksvið bæjarstjórnar skv. sveitarstjórnarlögum, enda sé þess óskað af bæjarstjóra, bæjarráði, lögmætri nefnd eða bæjarfulltrúa, að málið sé tekið á dagskrá.
3. Lögmætar kosningar nefnda og starfsmanna, svo og hvert það málefni annað, sem bæjarstjórn á að fjalla um að lögum.

Sá sem óskar að fá mál tekið á dagskrá bæjarstjórnarfundar, skal tilkynna það bæjarstjóra eigi síðar en kl. 12.00 föstudag næstan fyrir bæjarstjórnarfund.

Bæjarstjóri skal í síðasta lagi kl. 18.00, tveim dögum fyrir fund, hafa sent öllum bæjarfulltrúum dagskrá næsta bæjarstjórnarfundar.

Í dagskrá skal tilkynna fundarstað og tíma, þær fundargerðir, sem fyrir fundi liggja, tillögur, sem fram hafa komið, og gera í stuttu máli grein fyrir þeim málum öðrum, sem um skal fjallað. Fylgja skulu eftirrit fundargerða, tillagna, svo og annarra gagna, sem geta orðið til upplýsinga um málefni á dagskrá, eftir því, sem bæjarstjóri telur nauðsynlegt.

Ef ákveðinn verður aukafundur skv. 7. gr., skal að jafnaði boða til hans með dagskrá, er send verði bæjarfulltrúum með 24 stunda fyrirvara. Heimilt er þó að boða aukafund með styttri fyrirvara, ef aðkallandi mál bíður afgreiðslu, enda sé þess getið með fundarboðun, hvaða mál sé á dagskrá.

Mál skulu afgreidd í þeirri röð, sem dagskrá segir, nema bæjarstjórn ákveði, að önnur röð skuli höfð.

Heimilt er að taka mál á dagskrá, þótt ekki sé þess getið í fundarboði, ef brýna nauðsyn ber til, enda samþykki meiri hluti bæjarfulltrúa þau afbrigði.

9. gr.

Á reglulegum fundarstað bæjarstjórnar skal auglýsa opna fundi bæjarstjórnar með minnst 24 stunda fyrirvara og greina þar dagskrá fundar.

10. gr.

Bæjarstjórnarfundi skal halda í heyranda hljóði. Bæjarstjórn getur þó ákveðið að ræða einstök mál fyrir luktum dyrum, t. d. einkamál manna eða mál, sem æskilegt er vegna hagsmuna bæjarins, að rædd séu fyrir luktum dyrum. Einnig getur bæjarfulltrúi krafist þess, að mál verði rædd fyrir luktum dyrum, og sker bæjarstjórn úr því umræðulaust með meiri hluta atkvæða, hvort mál skuli rædd opinberlega eða fyrir luktum dyrum.

Óheimilt er að skýra frá því, sem fram kemur við umræður fyrir luktum dyrum. Ef áheyrandi á bæjarstjórnarfundi raskar fundarfríði, getur forseti látið vísa honum út.

11. gr.

Bæjarstjórn getur enga ályktun gert, nema helmingur bæjarfulltrúa sé á fundi og greiði atkvæði. Afl atkvæða ræður úrslitum mála.

Bæjarstjóri og hver bæjarfulltrúi getur horið fram breytingartillögu, viðauka-tillögu eða frávísunartillögu við hvert það mál, sem til umræðu er, og bæjarstjórn á úrskurðarvald um. Skulu slíkar tillögur vera skriflegar, en veita skal forseti fundar-mönnum ráðrúm til að semja þær, ef þörf krefur.

Ef jafnmörg atkvæði eru með máli og móti, fellur það, nema við kosningar, þá ræður hlutkesti.

Um kosningu bæjarstjóra og í stöður þær sem bæjarstjórn veitir, fer sem um kosningu forseta bæjarstjórnar.

Mál má afgreiða með því að sambykkja það eða fella, vísa því frá með einfaldri eða rökstuddri dagskrá, vísa því til afgreiðslu bæjarstjóra, bæjarráðs eða nefndar eða með því að fresta því.

Forseti sker úr um hvernig atkvæðagreiðslum um tillögur skuli hagað.

12. gr.

Bæjarstjórn afgreiðir mál með einni umræðu, nema fiárhagsáætlun bæjarins, ársreikninga og reglugerðir, sem hljóta skulu staðfestingu ráðherra.

Um þessi mál skulu fara fram tvær umræður og líða ein vika hið skemmsta milli umræðna.

13. gr.

Bæjarfulltrúi, sem vill taka til máls, skal óska heimildar forseta.

Að jafnaði skulu menn taka til máls í þeirri röð, sem þeir hafa kvatt sér hlióðs. Heimilt er forseta að víkja frá þessu, ef um er að ræða bæjarstjóra eða framsögumann svo og bæjarfulltrúa, sem gera vill stutta athugasemd eða leiðrétta ummæli um hann sjálfan, svo og til þess, að ræður skiptist jafnt með og móti málefni.

Ef tveir eða fleiri kveða sér samtímis hljóðs, ákveður forseti í hvaða röð þeir tala.

Ræðumaður skal standa við sæti sitt, meðan hann talar, nema forseti ákveði annað.

Bæjarstjórn getur heimilað, að maður utan bæjarstjórnar megi tala á bæjarstjórnarfundi, en skylt skal honum þá að gæta í hvívetna fundarskapa.

14. gr.

Flutningsmaður tillögu eða framsögumaður má tala þrisvar en aðrir bæjarfulltrúar tvisvar. Þó er bæjarfulltrúa heimilt að taka oftari til máls til þess að bera af sér ámæli, gera stutta fyrirspurn, athugasemd um atkvæðagreiðslu eða gæslu fundarskapa.

Ef bæjarfulltrúi vill beina fyrirspurn til bæjarstjóra, skal hann hafa hana skriflega og afhenda hana með sama fyrirvara og um tillögu sé að ræða.

Ræðumaður skal beina máli sínu til forseta. Ef bæjarfulltrúi tekur til máls við afgreiðslu á fundargerð nefndar, skal hann í upphafi taka fram, hvaða lið eða liði fundargerðar hann óski að ræða, og má ekki ræða nema eitt mál í einu.

Eigi má lesa upp prentað mál, nema forseti leyfi.

Skyllt er bæjarfulltrúa að lúta valdi forseta í hvívetna, er gæslu góðrar reglu varðar.

Ef bæjarfulltrúi ber aðra menn brigslyrðum, eða víkur verulega frá umræðufninu, skal forseti víta hann fyrir það og nefna þau ummæli, er hann vítir. Ef bæjarfulltrúi er víttur tvisvar á sama fundi, má forseti svipta hann málfrelsi á

þeim fundi. Ef bæjarfulltrúi hlýðnast ekki, eða ef almenn ókyrrð kemur upp á fundi, skal forseti fresta fundi um stundarsakir eða slíta fundi alveg, ef honum þykir nauðsyn til bera.

15. gr.

Ef forseti telur umræður dragast úr hófi fram, getur hann lagt til, að ræðutími hvers bæjarfulltrúa megi ekki fara fram úr ákveðinni tímalengd.

Þá getur forseti, hvenær sem er, lagt til, að umræðu skuli lokið á ákveðnum tíma. Ekki má þó takmarka umræðu svo, að hún standi skemur en tvo tíma, meðan nokkur bæjarfulltrúi kveður sér hljóðs.

Bæjarstjórn afgreiðir tillögur forseta, skv. 1. og 2. mgr. umræðulaust, 2 bæjarfulltrúar hið fæsta geta borið fram slíkar tillögur, og skulu þær einnig afgreiddar umræðulaust.

16. gr.

Atkvæðagreiðsla fer þannig fram, að bæjarfulltrúar rétta upp aðra hönd sína. Nafnakall skal hafa, ef forseti ákveður, bæjarstjóri óskar eða tveir bæjarfulltrúar hið fæsta. Við nafnakall greiða bæjarfulltrúar atkvæði eftir skrá um bæjarfulltrúa í staf-rófsröð og skal hlutkesti ráða hverju sinni á hverjum skal byrja. Nöfnum varafulltrúa skal bætt á skrána í rétttri röð, í stað nafna þeirra, sem fjarstaddir eru. Við nafnakall er bæjarfulltrúa skylt að greiða atkvæði, nema hann færi rök fyrir undanfærslu sinni, er forseti tekur gild. Ef bæjarfulltrúi vill ekki una úrskurði forseta, má hann skjóta úrskurðinum til bæjarstjórnar, sem sker úr án umræðu.

17. gr.

Eftir hvern bæjarstjórnarfund skal senda öllum bæjarfulltrúum eftirrit af fundargerð ásamt fylgiskjölum hennar.

18. gr.

Bregða má út af fundarsköpum þessum eftir uppástungu forseta, bæjarstjóra eða tveggja bæjarfulltrúa, enda samþykki að minnsta kosti $\frac{2}{3}$ (tveir þriðju) þeirra bæjarfulltrúa, sem á fundi eru.

19. gr.

Bæjarstjórn getur ákveðið, að allar umræður í bæjarstjórn skuli skrásettar. Má þá ekkert niður fella, sem fram hefur komið á fundi bæjarstjórnar og handrit af umræðum bera með sér. Engar breytingar má gera, nema leiðrétta þurfi auðsæjar og sannanlegar villur.

Bæjarstjórn getur einnig ákveðið, að umræðurnar skuli gefnar út á prenti, ásamt því sem fest hefur verið í gerðabækur, svo og önnur skjöl, eftir því sem nauðsynlegt kann að þykja.

Ef bæjarstjórn ákveður slíka útgáfu, skal hún jafnframt kjósa nefnd tveggja bæjarfulltrúa til að hafa umsjón með útgáfunni.

Þá getur bæjarstjórn ákveðið, að bæjarstjórnarfundir skuli teknir á segulband, til geymslu einhvern ákveðinn tíma.

Eftir hvern bæjarstjórnarfund, þar sem umræður hafa verið skrásettar samkvæmt framanrituðu, skal öllum bæjarfulltrúum sent eftirrit af fundargerð ásamt fylgiskjölum hennar.

III. KAFLI.

Réttindi og skyldur bæjarfulltrúa.

20. gr.

Hverjum bæjarfulltrúa er skylt að sækja fundi bæjarstjórnar nema lögmat forföll hamli.

Honum er skylt að taka að sér þau störf, sem bæjarstjórn felur honum, t. d. forsetastörf, setur í bæjarráði eða öðrum nefndum o. s. frv.

Sá, sem verið hefur forseti bæjarstjórnar, setið í bæjarráði eða annarri nefnd, getur þó skorast undan kosningu jafnlangan tíma og hann hefur haft starfið á hendu. Bæjarfulltrúum er skylt að koma þrúðmannlega fram á bæjarstjórnarfundum, gæta þagnarskyldu um einkamál og hagi einstaklinga og féлага, sem þeir kynnu að fá vitneskju um sem bæjarfulltrúar.

Þá er þeim og skylt að gæta hagsmuna og velferðar bæjarins út á við sem inn á við, eftir sinni bestu getu.

21. gr.

Bæjarfulltrúum er heimilt að kynna sér skjöl bæjarins, stofnana og fyrirtækja hans.

22. gr.

Hver bæjarfulltrúi á rétt á tiltekinni þóknun fyrir störf sín í bæjarstjórn.

Eftir hverjar bæjarstjórnarkosningar ákveður bæjarstjórn, hver verða skuli þóknun bæjarfulltrúa á næsta kjörtímabili.

23. gr.

Ef bæjarfulltrúi, kosinn í nefnd eða til annarra starfa, forfallast um stundarsakir vegna veikinda eða af öðrum ástæðum, á hann rétt á að tilnefna mann af sama lista og hann var kjörinn, til að taka sæti hans á meðan, enda hafi varafulltrúi ekki verið kosinn.

Hafi hann engan tilnefnt, fer um varamenn skv. 2. og 3. mgr. 20. gr. sveitarstjórnarlaga.

24. gr.

Bæjarstjórn getur veitt bæjarfulltrúa, sem óskar þess, lausn frá bæjarfulltrúa-starfi.

IV. KAFLI

Um bæjarráð.

25. gr.

Á fyrsta fundi nýkjörinnar bæjarstjórnar og síðan á fyrsta fundi í júní ár hvert, skulu kosnir 3 bæjarfulltrúar í bæjarráð og jafnmargir til vara. Kosning bæjarráðs gildir, uns nýtt bæjarráð hefur verið kosið.

Bæjarráð kys sér formann og má kjósa bæjarstjóra, þótt ekki sé hann kjörinn í ráðið.

Bæjarráð skal halda fund að jafnaði sex sinnum í mánuði. Heimilt er þó að fella niður fundi með samþykkt allra bæjarráðsmanna. Aukafund skal halda, ef bæjarstjóri ákveður það eða tveir bæjarráðsmenn hið fæsta óska þess skriflega.

Bæjarstjóri undirbýr dagskrá bæjarráðsfunda.

Formaður sér um, að allt fari löglega og skipulega fram á fundum, og úrskurðar ágreiningsmál, sem rísa kunna út af fundarsköpum. Þeim úrskurði má skjóta til úrlausnar bæjarráðs.

Bæjarráð ræður fundarritara utan bæjarráðs.

Í gerðabók skal greint frá því, hvar fundur sé haldinn og hvenær, hverjir sitji fundinn og hver sé fundarritari. Þar skal greint frá framlögðum skjölum og efni þeirra í stuttu máli, svo og hverja afgreiðslu þau fá.

Um fundarsköp bæjarráðs fer eftir sömu reglum og gilda um bæjarstjórn eftir því, sem þau geta átt við.

26. gr.

Bæjarráð fer ásamt bæjarstjóra með framkvæmdastjórn málefna Keflavíkur-kaupstaðar að því leyti, sem hún er ekki öðrum fengin skv. lögum, reglugerðum eða sérstökum samþykktum bæjarstjórnar.

Bæjarráð tekur fullnaðarákvörðun um þau mál, sem til þess koma, nema um veruleg fjárhagsatriði sé að ræða eða málefni, þar sem ákvörðun bæjarstjórnar er sérstaklega áskilin að lögum.

Ekki getur bæjarráð þó tekið fullnaðarákvörðun um mál, ef bæjarráðsmaður eða bæjarstjóri óskar, að bæjarstjórn taki fullnaðarákvörðun um það.

27. gr.

Bæjarráð hefur í umboði bæjarstjórnar eftirlit með fjárreiðum bæjarins, sbr. sveitarstjórnarlög. Það undirbýr árlega fjárhagsáætlun bæjarins og sér um, að reikningar hans séu samdir.

Bæjarráð ákveður, hvernig varið skuli fé því, sem ætlað er til verklegra framkvæmda, að því leyti, sem slíkt er ekki fram tekið í fjárhagsáætlun.

28. gr.

Skylt er starfsmönnum bæjarins að sitja fundi bæjarráðs, þegar til umræðu eru málefni, sem störf þeirra snerta og þess er óskað af bæjarstjóra eða bæjarráði.

V. KAFLI

Um bæjarstjóra.

29. gr.

Bæjarstjórn ræður bæjarstjóra. Ráðningartími skal að jafnaði vera hinn sami og kjörtímabil bæjarstjórnar.

Heimilt er þó að ráða bæjarstjóra til lengri tíma, en þá er ráðningarsamningur uppsegjanlegur af beggja hálfu með sex mánaða fyrirvara, hvenær sem er, eftir að kjörtímabilinu er lokið.

Nú næst ekki meirihluti í bæjarstjórn fyrir ráðningu bæjarstjóra, svo og, ef bæjarstjóri er í andstöðu við meirihluta bæjarstjórnar, og getur þá ráðherra ákveðið, að bæjarstjórnarkosningar skuli fram fara á ný.

30. gr.

Bæjarstjóri hefur á hendi framkvæmd ákvarðana þeirra, sem bæjarstjórn gerir, og framkvæmd á málefnum bæjarins yfirleitt að því leyti, sem bæjarstjórn hefur ekki ákveðið annað um tiltekin mál. Skylt er bæjarstjóra að hafa ákveðinn viðtals-tíma og sé hann auglýstur á skrifstofu bæjarins.

31. gr.

Bæjarstjóri á sæti á fundi bæjarstjórnar og bæjarráðs og hefur þar sömu réttindi og skyldur sem bæjarfulltrúar, nema annað sé sérstaklega fram tekið í þessari samþykkt.

Ekki hefur hann atkvæðisrétt, nema jafnframt sé hann bæjarfulltrúi. Hann hefur óbundið málfrelsi og tillögurétt á fundum bæjarstjórnar og bæjarráðs, og einnig allra nefnda bæjarins ef hann óskar þess.

32. gr.

Nú samþykkir bæjarstjórn ályktun, sem hefur verulegan kostnað í för með sér, sem ekki hefur verið gert ráð fyrir á gildandi fjárhagsáætlun, og getur bæjarstjóri þá fellt slíka ályktun úr gildi um sinn, og skal þessi ákvörðun hans færð í gerðabókina.

Um þetta skal hann svo fljótt sem verða má senda félagsmálaráðuneytinu skýrslu, og leggur það úrskurð á málið. Bæjarstjóri skal senda bæjarstjórninni eftirrit af skýrslunni, svo að hún geti gert athugasemdir við hana, áður en hún fer til ráðuneytisins.

Þá getur bæjarstjóri skotið til fullnaðarákvörðunar bæjarstjórnar ályktunum bæjarráðs, sbr. 3. mgr. 26. gr.

33. gr.

Útgjöld sem ekki eru lögbundin, samningsbundin eða leiða af fyrri samþykkt bæjarstjórnar, má ekki greiða, nema til komi samþykki bæjarráðs eða bæjarstjórnar.

Ekkert gjald má greiða úr bæjarsjóði, nema bæjarstjóri ávísi því til greiðslu eða einhver sá, sem fengið hefur umboð bæjarráðs til slíks.

34. gr.

Í forföllum bæjarstjóra gegnir bæjarritari störfum hans nema þau séu sérstaklega öðrum falin. Forfallist bæjarstjóri um lengri tíma, skal bæjarráð setja mann til að gegna störfum hans, en þó aldrei lengur en þrjá mánuði í senn.

VI. KAFLI

Endurskoðendur.

35. gr.

Bæjarstjórn kýs tvo endurskoðendur til eins árs í senn og tvo til vara til að endurskoða reikninga bæjarins og fyrirtækja hans.

Bæjarfulltrúar eru ekki kjörgengir til þessa starfs.

Um framkvæmd endurskoðunar fer eftir ákvæðum sveitarstjórnarlaga.

Lokið skal endurskoðun ekki síðar en 30. júní ár hvert.

36. gr.

Bæjarráði er skylt að fela löggiltum endurskoðanda að endurskoða reikninga bæjarins og fyrirtækja hans, sbr. 35. gr. Jafnframt getur það falið honum að hafa eftirlit með uppsetningu ársreikninga og gæta þess að kröfum í lögum og reglum um bókhald og endurskoðun sveitarfélaga sé fullnægt. Senda skal hann bæjarráði skýrslu um niðurstöður sínar áður en bæjarráð gerir tillögu um afgreiðslu ársreikninga til bæjarstjórnar.

VII. KAFLI

Nefndir.

37. gr.

Bæjarstjórn kýs hlutfallskosningu eftirtaldar nefndir, fulltrúa í nefndir og starfsmenn, auk þeirra sem áður getur, til að fara með tiltekin málefni:

A. Fyrir allt kjörtímabil bæjarstjórnar:

1. Fimm menn í bygginganefnd og fimm til vara.
2. Fimm menn í framtalsnefnd og fimm til vara.
3. Fjóra menn í stjórn Sjúkrasamlags Keflavíkur og fjóra til vara.
4. Fimm menn í barnaverndarnefnd og fimm til vara.
5. Fimm menn í skólanefnd og fimm til vara.
6. Þrjá menn í bókasafnsstjórn og þrjá til vara.
7. Þrjá menn í heilbrigðisnefnd og þrjá til vara.
8. Þrjá menn í húsaleigunefnd og þrjá til vara.
9. Þrjá menn í stjórn verkamannabústaða og þrjá til vara.

10. Þrjú menn í rafveitunefnd og þrjú til vara.
 11. Þrjú menn í sérleyfisbifreiðanefnd og þrjú til vara.
 12. Fimm menn í Þjóðhátíðanefnd og fimm til vara.
 13. Fimm menn í skrudgarða- og fegrunarnefnd og fimm til vara.
 14. Fimm menn í umferðarnefnd og fimm til vara.
 15. Fjóra menn í íþróttaráð og fjóra til vara. Auk þess einn tilnefndur af íþróttabandalagi Keflavíkur, og einn til vara.
 16. Fimm menn í félagsmálaráð og fimm til vara.
 17. Sex menn í áfengisvarnarráð og sex til vara. Auk þess einn skipaður af ráðherra.
 18. Sjö menn í æskulýðsráð og sjö til vara, þar af fjórir samkv. tilnefningu.
 19. Þrjú menn í gatnagerðarnefnd og þrjú til vara.
 20. Þrjú menn í skipulagsnefnd og þrjú til vara.
 21. Fimm menn í náttúruverndarnefnd og fimm til vara.
 22. Þrjú menn í listasafnsnefnd og þrjú til vara.
 23. Tvo menn í starfsmannaráð og tvo til vara. Auk þess kýs starfsmannafélag Keflavíkurbæjar tvo menn og tvo til vara.
 24. Þrjú menn í skólanefnd Tónlistaskóla Keflavíkur og þrjú til vara. Auk þess tilnefnir Tónlistafélag Keflavíkur tvo.
 25. Fimm menn í jafnréttisráð og fimm til vara.
 26. Fimm menn í atvinnumálanefnd og fimm til vara. Auk þess einn frá Verkalýðsfélagi og einn frá Vinnuveitendafélagi Suðurnesja.
 27. Fimm menn í stjórn „Vatnsnes“ Byggðasafns Suðurnesja, og fimm til vara.
 28. Einn mann í stjórn Eftirlaunasjóðs starfsmanna Keflavíkur og einn til vara.
 29. Almannafræðingarnefnd samkvæmt lögum.
 30. Fulltrúa á landsþing Sambands íslenskra sveitarfélaga, jafnmarga og heimilt er hverju sinni og jafnmarga til vara.
 31. Forðagæslumann og annan til vara.
 32. Fulltrúa í fulltrúaráð Brunabótafélags Íslands og einn til vara.
 33. Tvo menn í sáttanefnd og tvo til vara.
- B. Til eins árs:
1. Fulltrúa í stjórn Sambands sveitarfélaga á Suðurnesjum og einn til vara.
 2. Fulltrúa í stjórn Sorphreinsunarstöðvar Suðurnesja og einn til vara.
 3. Þrjú fulltrúa á aðalfund Hitaveitu Suðurnesja og þrjú til vara.
 4. Fulltrúa í stjórn Brunavarna Suðurnesja og einn til vara.
 5. Fulltrúa í stjórn sjúkrahúss Keflavíkurlæknishéraðs og einn til vara.
 6. Fulltrúa í stjórn Heilsugæslustöðvar Suðurnesja og einn til vara.
 7. Fulltrúa í stjórn Fjölbrautarskóla Suðurnesja og einn til vara.
 8. Fulltrúa í Bláfjallanefnd og einn til vara.
 9. Fulltrúa í stjórn Reykjanesfólksvangs og einn til vara.
 10. Fulltrúa í stjórn Garðvangs og einn til vara.
 11. Kjörstjórnir samkvæmt lögum.
- C. Aðrar nefndir vegna sérstakra samþykktu bæjarstjórnar.
- Nú breytist meirihlutasamstarf í bæjarstjórn á kjörtímabilinu og má þá kjósa í nefndir, sem nefndar eru í A-lið, að nýju fyrir það sem eftir er kjörtímabilsins, þar sem lög leyfa.
- Formenn skulu sjá um, að nefndir séu boðaðar til fundar. Ef tveir nefndarmenn hið fæsta, óska eftir, að fundur sé haldinn í nefnd þeirri, sem þeir eiga setu í, geta þeir farið fram á það við nefndarformann og skal hann þá boða nefndina til fundar, svo fljótt sem auðið er. Einnig getur bæjarstjóri boðað, að fundir skuli haldnir í nefndum ef honum þykir ástæða til, til að ræða ýmis bæjarmál.
- Bæjarstjórn kýs formenn nefnda, sem starfa á vegum bæjarstjórnar, nema öðruvísi sé fyrir mælt í lögum, reglugerðum eða sérstökum samþykktum bæjarstjórnar.

38. gr.

Um skipan nefnda, valdsvið þeirra og verksvið fer eftir því, sem ákveðið er í lögum eða samþykktum bæjarstjórnar.

Þar sem ekki er um slíkar reglur að ræða, getur bæjarstjórn sett þær.

Ekki má framselja slíkri nefnd vald, sem bæjarstjórn er fengið að lögum.

Kjörtímabil nefnda og umboð nefndarmanna falla niður þegar kjörtími bæjarstjórnar er á enda nema um sé að ræða nefnd, sem fengið hefur til úrlausnar ákveðið afmarkað verkefni, þá skal litið svo á, að starfi hennar ljúki fyrst, er verkefnið er til lykta leitt, eða bæjarstjórn leggur nefndina niður.

39. gr.

Allar nefndir bæjarstjórnar skulu færa gerðabækur um störf sín og skulu fundargerðir fastanefnda, svo og nefnda, sem bæjarstjórn setur í einstöku máli, lagðar fyrir bæjarstjórn til meðferðar og endanlegrar samþykktar eða synjunar.

VIII. KAFLI

Um starfsmenn bæjarins.

40. gr.

Bæjarráð skipar fasta starfsmenn bæjarins, og veitir þeim lausn eftir því, sem nánar segir í samþykkt þessari, nema vald til slíks sé að lögum fengið öðrum aðilum eða á annan veg mælt fyrir í reglugerðum um sérmál tiltekinna stofnana.

Bæjarráð getur falið forstöðumönnum bæjarstofnana að ráða í ákveðnar stöður.

Fastar stöður skulu að jafnaði auglýstar til umsóknar, en heimilt er þó bæjarráði að skipa í stöðu án slíkrar auglýsingar. Bæjarstjórn (eða bæjarráð) getur ákveðið hver almenn skilyrði skuli gilda um skipun í stöður hjá bænum, svo sem sérskilyrði, er gilda skuli um ákveðnar stöður.

Um réttindi og skyldur starfsmanna bæjarins gilda ákvæði reglna um réttindi og skyldur starfsmanna Keflavíkur, eftir því sem við getur átt, nema annað sé sérstaklega ákveðið í samþykktum bæjarstjórnar. Bæjarstjóri f. h. bæjarráðs getur sett starfsmönnum erindisbréf og ákveðið þar starfssvið þeirra.

Skýlt er starfsmönnum að hlýða breytingum á starfssviði sínu, enda missi þeir einskis af launum við þá breytingu.

IX. KAFLI

41. gr.

Til þess að gera breytingu á samþykkt þessari, þarf umræður á tveimur fundum í bæjarstjórn, samþykki meirihluta atkvæða og staðfestingu félagsmálaráðuneytisins.

Samþykkt þessi, sem bæjarstjórn Keflavíkurkaupstaðar hefur samið og samþykkt, staðfestist hér með samkvæmt lögum nr. 58 29. mars 1961 til þess að öðlast gildi þegar í stað, og birtist til eftirbreytni öllum þeim, sem hlut eiga að máli.

Jafnframt er úr gildi numin Samþykkt um stjórn bæjarmálefna í Keflavíkurkaupstað nr. 113 22. maí 1965.

Félagsmálaráðuneytið, 26. mars 1981.

F. h. r.

Hallgrímur Dalberg.

Hólmfriður Snæbjörnsdóttir.